

Fatschas traglischantas tar ils verd-liberals

Reacziuns dals tschintg cussegliers naziunals elegids

DA CLAUDIA CADRUVI / ANR

■ **La colliaziun da glistas cotschen-verd-liberala ha gudagnà l'elecziun en il Grischun e conquistà dus sezs. Hansjörg Hassler ha fatg cun 21 421 vuschs il meglier resultat dals tschintg cussegliers naziunals.** Omadus han traglischè ier dal plaschair – *Silva Semadeni* (ps) e *Josias Gasser* (pvl). La colliaziun tranter cotschens e verd-liberals ha pudì conquistar 26 pertschient da las vuschs e festivar in success. Las glistas da la pps han cuntanschì bunamain 25 pertschient da las vuschs.

La schanza da la colliaziun

«Jau sun fitg surstà», di Josias Gasser (pvl). El haja adina pensà ch'ina elecziun saja pussaivla e ch'ils verd-liberals hajan schanzas. Ma cun 16 123 vuschs – il terzmeglier resultat persunal – n'aveva el betg quintà.

I dovria adina cletg, di Gasser. Ils verd-liberals hajan dentant era premdi decisziuns sco en in'interpresa. Els hajan calculà ch'i dettia schanzas cun la colliaziun cun la ps e lura gughegià il pass. Cun ina colliaziun cun ils burgais n'avessan ils verd-liberals probabel betg gudagnà, manegia Gasser. Ina analisa da las cifras en detagl stoppia el dentant anc far cun temp e peda.

Per las dunnas a Berna

Ella n'haja betg quintà, ma sa chapescha sperà ch'ella gudogna l'elecziun, di Silva Semadeni (ps). Cun 13 153 vuschs ha ella distanzà *Jon Pult* – il concurrent intern da la ps – cun passa 3000 vuschs. Pult haja en mintga cas fatg in bellissem resultat e saja l'um da l'avegnir da la ps grischuna, di Semadeni.

Ina da las raschuns impurtantas per puspè candidar per il cussegl naziunal saja stà da garantir ch'ina dunna dal Grischun gaja a Berna, di Semadeni. En il cussegl naziunal veglia ella s'engaschar



Miran cun interess ils resultats: Stefan Engler (san.) che ha fatg in resultat excellent per ses sez en il cussegl dals chantuns e Tarzisius Caviezel che sto star a chasa e na sa frapreschentar pli il Grischun a Berna

per la sortida da l'energia atomara e: «Mia finamira èsi che *Eveline Widmer-Schlumpf* vegn puspè elegida en il cussegl federal.»

Hansjörg Hassler

Cun 21 421 vuschs ha *Hansjörg Hassler* cuntanschì il meglier resultat da tuts candidats per il cussegl naziunal. «Jau sun fitg satisfatg», di Hassler. Cuntent saja el era cun il resultat da sia partida. La pbd haja cuntanschì ina quota d'electurs da 20 pertschient, tge ch'ins n'haja strusch dastgà spetgar suenter la separaziun da la pps. Il resultat da la pbd grischuna sajan ina buna basa da partenar per batter per il sez dad *Eveline Widmer-Schlumpf* en il cussegl federal.

Che la pps grischuna haja era conquistà in sez en il cussegl naziunal na saja nagina surpraisa, di Hassler. I fetschia

dentant surstar che la pps e la pbd cuntanschan ensemen ina quota d'electurs da 45 pertschient.

Il Sursilvan gudogna

Il victur da la pcd *Martin Candinas* ha recalctgà 14 330 vuschs. «Jau sun natiralmain fitg cuntent ed hai immens plaschair da quest resultat», di Candinas. El haja fatg bleras vuschs en Surselva, nua ch'ins haja organisà blers electurs. I fetschia plaschair da sentir ch'ins vegnia purtà uschè ferm da l'atgna regiun. El veglia engraziar da tut cor a tut ils votants e las votantas per il sustegn.

Vincent Augustin, il concurrent intern da la pcd, ha Candinas distanzà cun raddund 3700 vuschs. Il 2007 aveva Candinas fatg 2487 vuschs sin la glista da la pcd giuvna.

Heinz Brand

Il segund meglier resultat dad ier ha *Heinz Brand* (pps) fatg. «Jau sun pli che cuntent, pertge jau n'hai betg pudì quintar cun l'elecziun», di Brand. L'entschatta dal cumbat electoral saja la pps stada davant ina «rusna naira». Ins haja mo savi che la pps stoppia cumbatter a moda consequenta. Uss saja la pps sa chapescha fitg cuntenta, di Brand.

Il bun resultat persunal saja er ina cumprova che sia lavur en l'uffizi da migraziun vegnia renconuschida. Che la pps ha mo per pauc manchentà in segund sez na deplorascha Brand betg. La pps grischuna saja ina nova partida ch'ins stoppia bajegiar si cuntinuadamain.

In segund sez fiss stà ina surpraisa enorma gronda.

Candidatas e candidats

Num	Vuschs
Gliesta 1 pps Grischun B	
<i>Heinz Brand</i>	18 581
Valérie Favre Accola	7 313
Christian Aliesch	6 875
Ernst Nigg	6 449
Domenic Toutsch	5 469
Gliesta 2 pps Internaziunal	
Paul Accola	1 872
Corina Hemmi-Pleisch	648
Peter Telli	446
Hansjörg Lippuner	376
Willi Forrer	363
Gliesta 3 Partida socialdemocratica ps	
<i>Silva Semadeni Bruderer</i>	13 153
Jon Pult	9 832
Beatrice Baselgia-Brunner	6 852
Peter Peyer	6 011
Andreas Thöny	5 030
Gliesta 4 pps Grischun I	
Jon Peider Lemm	6 631
Livio Zanolari	4 475
Andrea Davaz	3 749
Agnes Brandenburger-Caderas	1 897
Livio Bundi	1 866
Gliesta 5 pbd Grischun	
<i>Hansjörg Hassler</i>	21 421
Andy Kollegger	11 129
Jon Domenic Parolini	10 326
Elisabeth Mani-Heldstab	7 331
Andreas Felix	6 281
Gliesta 6 Partid socialdemocr. Juso	
Flurina Bezzola	988
Alvaro Ograbek	982
Lukas Horrer	848
Yvonne Michel	719
Enea Baselgia	580
Gliesta 7 pcd Grischun	
<i>Martin Candinas</i>	14 330
Vincent Augustin	10 584
Tino Zanetti	7 193
Elita Florin-Caluori	3 947
Renate Birrer	3 050
Gliesta 8 PLD. ILS liberals GR	
Tarzisius Caviezel	13 206
Rudolf Kunz	5 359
Michael Pfäffli	5 018
Andreas Züllig	4 898
Karin Niederberger	3 494
Gliesta 9 Partida verd-liberala pvl	
<i>Josias F. Gasser</i>	16 123
Tamara Pfaffen	2 967
Rinaldo Willy	2 565
Simon Casutt	2 057
Gliesta 10 JSVP Grischun	
Claudio Scandella	575
Jann-Andrea Thöny	528
Jan Koch	499
Adrian Capeder	371
Anja Pfister	236
Gliesta 11 pcd – ils giuvens	
Tanja Bundi	2 236
Kevin Brunold	1 270
Severin Geisseler	768
Heinrich Enrico Blumenthal	528
Sascha Eichelberger	255
Gliesta 12 pbd giuvna	
Romina Beeli	717
Leandro Buchmann	504
Franco Membrini	265
Fabian Obrist	244
Luca Bornhauser	236
Gliesta 13 Verda – Grünes Graubünden	
Anita Mazzetta	3 129
Angelo Andina	1 511
Rolf Marugg	855
Hans-Jörg Hahn	769
Gliesta 14 pld Grischun liberals giuvens	
Giancarlo Weingart	434
Martin Blumenthal	393
Manuela Fetz	323
Thomas Bigliel	223
Roman Rampa	208
Gliesta 15 Uniun federala democratica Grischun	
Erwin Königsdorfer	1 111

Dus sperdidiers: Tarzisius Caviezel e Vincent Augustin

La pld grischuna è la sperdidra da questas elecziuns – era sch'ella ha conquistà in sez en il cussegl dals chantuns. Che *Tarzisius Caviezel* na vegnia betg pli elegi n'ha nagin quintà.

Ha la pld simplamain gi ina glista memia flaivla? «Probabel», è la resposta da Caviezel. «Persunalmain hai jau fatg 25 pertschient daplì vuschs ch'il 2007.» La pld avess forse stui far en il Grischun la colliaziun cun la pcd e pbd, manegia Caviezel. Ma anc auters motivs gioghian ina rolla. «Nus essan stads memia segirs suenter che nus avain gudagnà l'onn passà las elecziuns chantunalas.» La terrada da la pld grischuna correspundia plinavant al trend naziunal.

Adina sin il segund plaz

Gia per la terza giada tar elecziuns naziunalas cuntanscha *Vincent Augustin* (pcd) il segund meglier resultat da sia glista e manchenta uschia l'elecziun. El haja anc ina giada dà tut en quest cumbat electoral ed empruvà da far ina pulita campagna, di Augustin. El na vegnia en quatter onns betg pli a candidar per il cussegl naziunal. «Quest chapitel è definitivamain serrà giu.» Tar las ultimas duas elecziuns aveva Augustin manchentà in'elecziun mo per paucas vuschs. Questa giada è la distanza tar il victur pli gronda. «Gliez è blier meglier», commentescha Augustin.



Consternaziun er tar quels dus commembers da la pld: Christian Rathgeb ed Urs Marti (da san.).



Success er per la verda grischuna: Rolf Marugg ed Anita Mazzetta.

FOTOS G. N. STIGIER

SVIZRA

Partidas etablidas sperdan, pbd e verds-liberals gudognan

(Iq) **Tenor las prognosas da la SSR vegna tut las partidas grondas - inclusiv la partida populara svizra - a perder vuschs e mandats. Tranter ils victurs sa chattan per surpraisa ils verd-liberals e la partida burgais-democratica.** Tenor ina emprima prognosa da la SSR vegn la pps a perder set da ses 62 mandats actuals. Tenor questa prognosa sa sbassa la cumpart da vuschs per 2.1 pertschient sin 26.8 pertschient. Ella resta dentant vinavant la pli ferma partida. La segund ferma partida è la partida socialdemocratica che gudogna in mandat e duess la fi-

nala dumbrar 44 mandats. La ps ha dentant era pers 0.6 pertschient da las vuschs da partida.

La partida liberaldemocratica acquistà da nov 31 mandats, quatter pli paucs che fin qua. Sia procentuala da l'ectorat sa sbassa da 17.7 pertschient sin 15 pertschient. Era la partida cristiandemocratica vegn splimada, ella perda 3 da ses 31 mandats da fin qua.

Sche las prognosas fatgas da la SSR van en vigur lu tutgan ils verds tranter ils pli gronds sperdidiers dal di. Els ston probabel renunziar 7 dals 20 mandats actu-

als. La cumpart dals verd-liberals sa sbassa per 9.6 sin 8.3 pertschient.

Burgais-democrats e verd-liberals sco victurs

Cun in acquist da 9 mandats novs en cumparegliaziun cun las elecziuns da 2007 han la partida burgais-democratica ed ils verd-liberals. Ils verd liberals contonschan da nov 12 mandats ed ina cumpart da l'ectorat 5.5 pertschient. La partida burgais-democratica ha cuntanschì 9 mandats ed ina cumpart da l'ectorat da 5.4 pertschient.